


# NZAMBI KELE MUTENDUDI

## NA YANDI MOSI

 Tata na beto ya Mazulu, Ndinga na Nge lenda tuba mingi kulutila yina muntu nionso lenda sala to lenda tuba na ntangu nionso, samu bantu ke vingila na kumona Nge. Mpe beto ke tonda Nge samu kele na bayina kele na lukwikikilu ya kima mosi, bawu ke sosa kima mosi kusalama. Mpe na ntangu ya bantu kele na nsatu ya kima mosi, mudindu ke bokilaka Mudindu, kuna lunga vwanda kaka na Mudindu mosi samu na kupesa mvutu na kubokila yina. Samu na yawu beto kele awa na nkokila yayi, samu yawu wandaka na bantima ya balongi yayi, mpe bantu yayi na kubokila beto kintwadi na kulomba na Nge lusadusu mpe masakumunu, na kukwikilaka tí Nge ke belula bambevo mpe ke vulusa bayina vilaka, mpe Nge ke monisa Ndinga na Nge.

<sup>2</sup> Mpe beto ke sambila, Tata ya Mazulu, tí Nge ke pesa beto yawu na mutindu beto ke vingila Nge na kukikulumusa nionso nkokila na manima ya nkokila. Bika tí kuna kuvwanda na kutiamuka mosi ya Mpeve-Santu, mpe bika tí konso muntu kufwa meso na konso kima yina yankaka ke ziunga bawu, bika kaka Nzambi. Bika tí kuboka ya nene kubasika na kati ya bantu, na nsatu ya Nzambi, tii kuna ke kwisa reveil mosi na yinsi awa mpe konso yinzo-Nzambi ke vwanda ya kufuluka na bantu, bansumuki ke boka na kubaka mawa ya Nzambi, mpe—mpe Mpeve-Santu ke belula bambevo, ke telemisa bikata, mpe ke vumbula bafwa, mpe ke pesa kivuvu samu na bima yayi yandi silaka na Ndinga na Nge.

<sup>3</sup> Kwisa, Mfumu Yesu, mpe lungisa nsilulu na Nge. Kwisa na beto na nkokila yayi. Beto ke kwikila tí Nge kele mutindu mosi mazono, bubu, mpe kukonda nsuka, mpe bansilulu na Nge lenda kubwa ve. Zulu na ntoto ke luta kasi Ndinga na Nge ke luta ve. Bika tí luzabu ya beto kuzibuka. Bika tí Mpeve-Santu kwisa mpe kulumuka na ntoto ya mbote. Bika tí luzabu na beto kuzibuka na Mpeve mpe na ngolo ya Nzambi na nkokila yayi, tí Yandi lenda monisa ba Ndinga ya nsilulu na Yandi na nzila na beto. Samu beto ke lomba yawu na Nkumbu ya Yesu. Amen.

<sup>4</sup> Ntangu yayi, na nkokila yayi, beno yina ke tala masonuku, beto zibula Biblia na Buku ya Zole ya Pierre, mpe kubanda na nzila ya 15, kaka samu na kutubila Masonuku na ntangu fioti.

*Kasi mu ke sala nionso yina mu lunga sala samu ti beno bambuka moyo na mambu yina na manima ya lufwa na munu.*

*Beto landaka ve mambu, bansangu ya luvunu yina ke katukaka na mabanza ya muntu, ntangu beto zabisaka beno ngolo mpe kwizulu ya Mfumu Yesu Klisto, kasi beto vwandaka bambangi ya meso ya bunene na yandi.*

<sup>5</sup> Munu zola mingi yayi, “bambangi ya meso.” Yawu kele mwansangu ya luvunu ve. Beto kele bambangi ya yina beto ke tubila.

*Na yawu yandi zwaka na Nzambi Tata luzitu mpe nkembo, mpe ndinga mosi kwisaka na yandi yina katukaka na nkembo ya kulutila mbote, Yayi kele Mwana na munu ya zola, na yandi Mu me tula kiwvu na munu.*

*Mpe ndinga yayi katukaka na zulu yina beto wàka, ntangu beto vwandaka na yandi na mongo ya santu.*

*Beto kele mpe na yina me luta profesi; na yawu beno lenda widikila mbote tí beno sala keba, mutindu nsemo ke sema na . . . na kati ya mpimpa, tii na kubasika ya mwini, mpe kubasika ya mbwetete na bantima na beno:*

*Na kuzabaka yayi ntete, tí ata profesi mosi ve ya masonuku kele ntendulu ya konso muntu.*

*Samu ti profesi kwizaka ve na bantangu ya ntama na luzolo ya muntu: kasi muntu ya santu yina Nzambi twadisaka na Mpeve-Santu.*

<sup>6</sup> Bika tí Mfumu kusakumuna diaka kutanga ya Ndinga na Yandi. Ntangu yayi, munu ke baka yayi mutindu yintu ya dilongi: *Nzambi Kele Mutendudi Na Yandi Mosi.*

<sup>7</sup> Beto ke zinga na kilumbu ya mvwanzi. Beto ke zinga na kilumbu yina babakala na bakento zaba mbote yinki kusala. Konso kima, yawu—yawu ke monana mutindu tí yawu kele na kati ya mvwanzi. Bima nionso, ke monana mutindu tí yawu kele na baluswaswanu mingi ya banzila na kutala mbote. Yina ke Satana ke sala mutindu yina.

<sup>8</sup> Ntangu yayi, Nzambi lenda ve kusambisa bantu na kieleka nionso, mbote-mbote, kukonda musiku mosi na nzila na yawu Yandi lunga sambisa bawu. Mpe Biblia ke tuba tí Yandi ke sambisa muntu nionso na nzila ya Yesu Klisto, mpe Yesu Klisto kele Ndinga. Na Santu Jean, na kapu 1, Yawu tubamaka ti:

*Na mbatukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.*

*Mpe Ndinga kumaka muntu, mpe zingaka na kati na beto, . . .*

<sup>9</sup> Ntangu yayi, nionso yina beto kele bubu yayi kele kutadisama ya bisalu na Yandi. Kati na Nzambi . . . Ntete Yandi vwandaka Nzambi ve, Nzambi, beto lungaka kaka kubokila Yandi “Ya Kukonda nsuka.” Yandi vwandaka Nzambi ve, samu mpova (mpova ya Kingelesi) *Nzambi* zola tuba tí “kima ya

kusambila” mpe kuvwandaka na kima ve samu na kusambila Yandi. Na yawu Yandi vwandaka ya Kukonda nsuka, Kiziba mosi ya nene ya mayele nionso. Mpe na kati ya Kiziba yayi ya mayele nionso vwandaka ve na atome, molecule to kima mosi ve, nsemo vwandaka kisika mosi ve, mbwetete, ngonda, kima yankaka ve. Nzambi, ya beto zaba mutindu Nzambi, Mpeve ya nene yina vwandaka ya Kukonda nsuka (kubandaka ata fioti ve, kusukaka ata fioti ve), Yandi vwandaka kuna. Mpe na kati na Yandi vwandaka bisalu: yawu vwandaka kisalu ya kuvwanda Nzambi, kisalu na Yandi ya kuvwanda Tata, kisalu ya kuvwanda Mwana, kisalu ya kuvwanda Mvulusi, kisalu ya kuvwanda Munganga. Bisalu yayi nionso vwandaka na kati na Yandi. Mpe ntangu yayi Yandi. . . Bima yina monisamaka kubanda ntama kele kaka kumonisama ya bisalu na Yandi

<sup>10</sup> Yina mu zola tuba, *bisalu* vwandaka “mabanza” na Yandi. Mpe *ndinga* kele “dibanza yina me tubama.” Mpe yina vwandaka na mabanza na Yandi. Mpe ntangu Yandi tubaka, “Bika tí yawu vwanda,” mpe yawu vwandaka. “Bika tí yawu vwanda,” mpe yawu vwandaka.

<sup>11</sup> Mpe ntangu yayi, bambuka, beno Baklisto vwandaka mabanza na Yandi na ntwala yinza kuvwanda. Mpe beno kele kumonisama ya dibanza na Yandi. Na ntwala yinza kuvwanda, beno vwandaka na kati ya Klisto, (amen) na kati ya Nzambi na mbatukulu. Yina ke sala beno, tí, beno ke mona, bantu na Yandi. Mpe nionso yina kele Nzambi, Yandi mosi, ke kukimonikisa Yandi mosi pwelele tí bawu lunga simba Yandi, mona, mpe—mpe nionso yina. Mpe tala nionso yina kele Nzambi, na muvimba na yawu.

<sup>12</sup> Bantu ke tuba tí, “Ntendulu. . .” Ntama mingi ve awa mu vwandaka tuba na lukutakanu mosi, bakala mosi tubaka na munu, yandi tubaka, “Mpangi Branham, nge ke na ntendulu ya yimbi. Nge ke tendula Yawu mbote ve.”

<sup>13</sup> Ntangu yayi, beto ke wa. . . Bawu ke kwenda na ba Methodiste, mpe bawu ke tuba “Ba Baptiste ke tendula mbote ve.” Ba Baptiste ke tuba, “Ba Pentecotiste ke tendula mbote ve.” Ba Pentecotiste ke tuba tí “Ba Unitaire ve.” Ba Unitaire ke tuba tí, “Ba Assemblée ve.” Mpe mosi na mosi ke tuba ti yina yankaka ve.

<sup>14</sup> Nzambi kele Mutendudi na Yandi mosi! Yandi ke na nsatu ya muntu mosi ve na kutendula na kisika na Yandi. Yandi ke sala ntendulu Yandi Mosi. Nani lenda tendula Nzambi? Nzambi kele Mutendudi na Yandi Mosi.

<sup>15</sup> Ntangu yayi, awa Pierre ke tuba tí, beto me bakula tí na mbatukulu ntangu Nzambi tubaka, “Bika tí nsemo kuvwanda,” mpe nsemo kuvwandaka, mpe yina kele ntendulu na yawu. Ntangu Nzambi tubaka konso kima yina mpe yawu monisamaka, yina kele ntendulu ya Nzambi tí Ndinga na Yandi

kele ya kieleka. Beno me mona? Ntangu Yandi tubaka, “Bika tí nsemo kuvwanda,” yawu vwandaka ntete na dibanza na Yandi na ntwala nsemo kumonana. Ntangu Yandi tubaka, “Bika tí nsemo kuvwanda,” nsemo basikaka na kati ya mazulu, yina kele ntendulu. Ata muntu mosi ve lenda tendula yawu, samu Nzambi tubaka yawu mpe yawu vwandaka mutindu yina. Na ntangu Nzambi ke tuba mpe yawu ke monisama, yina kele ntendulu ya Ndinga na Yandi. Samu na yinki bantu lenda mona yawu ve? Samu na yinki bantu ke mona yawu ve?

<sup>16</sup> Na ntangu Nzambi ke sala nsilulu mpe Nzambi ke tuba. . . Na—na mbatukulu, na Genese, Yandi kabulaka Ndinga na Yandi na konso nsungi mutindu Yawu ke banda na mbatukulu tii na nsuka. Mpe, na kati ya bansungi yayi, dibuundu ya yinza yukisaka bima yayi nionso na binkulu, mpe nionso yina, mpe Nzambi ntangu nionso ke tindaka na kisalu, na kati ya Ngwisani ya Nkulu mpe ya Malu-malu, ba profete! Mpe Ndinga ya Mfumumu ke kwisaka na profete. Mpe yinki mutindu Yawu ke salaka? Yawu ke monikisa Ndinga ya Nzambi. Kumonisama ya Nzambi, yina ke tuba tí kana yawu kele mbote to yimbi. Muntu mosi ve lenda tendula Yawu, Ndinga ke kukitendula Yawu mosi. Nzambi pesaka nsilulu mpe yawu ke salama!

<sup>17</sup> Yinki mbote yawu ke sala na kutuba kima yankaka samu na Yawu? Yinki nsumuki lenda tuba (na ntangu Nzambi pesaka nsilulu na yandi mpe Nzambi ke lungisa yawu) tí ntendulu yina kele ya luvunu? Yina kele Nzambi Yandi mosi ke sala Ntendulu na Yandi, ke tendula. Yandi kele na nsatu ya muntu ve na kutendula Yandi, Yandi ke kukitendula Yandi mosi na kumonisaka yina Yandi silaka tí Yandi ke sala.

<sup>18</sup> Oh, kana dibuundu lungaka mona yina mpe kumona bansilulu yina kabulamaka na konso nsungi! Na bansungi nionso yankaka, Nzambi tindaka na kisalu (na kati ya bansungi sambwadi ya dibuundu) mpe monisaka konso kima yina Yandi tubaka na kusala. Bima nionso, kele na kima mosi ve yina salamaka ve. Ya kieleka! Yina Yandi tubaka tí Yandi ke sala, Yandi salaka yawu.

<sup>19</sup> Samu ntangu Nzambi tubaka, kuna na Esaie, Yandi tubaka, “Mwense mosi ke kuzwa kivumu,” mpe yandi zwaka yawu. Ntangu yayi, nani—nani lenda tendula yawu? Nzambi salaka ntendulu. Yandi tubaka, “Mwense mosi ke kuzwa kivumu,” mpe yandi zwaka kivumu. Ntangu yayi, yinki beno ke. . . beno lenda ve. . . Kima mosi ve lunga tubama samu na yawu, samu Nzambi tubaka yina yandi zolaka mpe yandi salaka yawu. Kasi dibuundu vwandaka ya kufwa meso mingi na kumona yawu. Beno me mona, bawu vwandaka na dibanza na bawu mosi samu na yawu. Yawu vwandaka ya kulutula—kulutula luswaswanu mingi na yina bawu vwandaka vingila.

20 Awa Pierre vwandaka tadisa yina salamaka ntete, yandi tubaka, “Nzambi monisaka Klisto na Ndinga na Yandi, Yandi tubaka, ‘Yayi kele Mwana na Munu ya zola.’” Bakwikidi yayi vwandaka ya kutelema kuna. Mpe Klisto vwandaka kumonisama ya Nzambi. Yandi monisaka ntangu nionso Klisto na Ndinga na Yandi, samu Klisto kele Ndinga. Yandi ke kukimonisa ntangu nionso.

21 Ntangu Yandi tubaka...Na bilumbu ya Noé, Klisto vwandaka na kati ya Noé. Beno ke kwikila yawu? Noé tubaka, “Yawu ke noka. Mvula ke vwanda, ntoto ke bebisama.” Yawu nokaka. Yawu vwandaka na nsatu ya ntendulu mosi ve. Yawu nokaka samu Nzambi, na kati ya Noé, tubaka ti, “Yawu ke noka.” Yandi vwandaka profete, mpe kidimbu vwandaka tí yina yandi tubaka salamaka. Bawu vwandaka ve na nsatu ya kutendula yawu.

22 Fioti kati na bawu lendaka, tuba, pene-pene, “Muntu yayi zaba ve yina yandi ke tuba.”

23 Kasi Nzambi pesaka kaka nsilulu, “Kana mosi na kati na beno kele ya kimpeve, to profete, mpe yina yandi ke tuba ke salama, beno kuwa yawu.” Yawu ke ya kieleka, samu yawu ke ya kieleka. Yawu lenda vwanda ya kusungama na Ndinga. Mpe Noé vwandaka ya kusungama na Ndinga. Na ntangu yandi pesaka profesi tí yawu ke noka, mpe yawu nokaka. Yina vwandaka na nsatu ya ntendulu ve, samu yawu salamaka kaka.

24 Esaie tubaka, “Mwense mosi ke kuzwa kivumu,” mpe yandi zwaka yawu. Ntangu yayi, yina vwandaka kima mosi ke salamaka ve. Samu, beno me mona, yawu vwandaka bankama ya bamvula na ntwala mwense yayi kuzwa kivumu.

25 Yawu vwandaka salama ve tii kuna bakala mosi ya mbote na nkumbu ya Joseph, bakala na yandi, “na kuvwandaka bakala mosi ya mbote mpe yandi zolaka ve kusala yandi mbandu ya bantu nionso . . .” Bakala yina ya mbote na bilumbu yina, Joseph yina ndimisamaka, na kuvwanda fiancé ya Marie.

26 Yandi vwandaka fiancée. Na kilumbu yina, kubebisa yawu, vwandaka kaka mutindu mosi na kusala pité. Mpe, ya kieleka, Joseph, yawu monanaka tí Marie vwandaka baka yandi mutindu kitaninu mosi, to kusala yandi muntu ya kutanina kifu na yandi, samu yandi kuzwaka kivumu, kukonda bawu kwela yandi, yandi vwandaka kaka fiancée. Kima mutindu yina, bawu lendaka losa nge matadi mpe kufwa nge; yawu vwandaka, musiku ya ngolo.

27 Mpe Joseph, bakala na yandi, vwandaka bakala ya mbote, bakala mosi ya kulutila mbote. Yandi kwikilaka na Nzambi. Mpe yandi lungaka tala yandi na meso yina ya kitoko, ya nene mpe ya pete-pete, mpe tubaka, “Joseph, Gabriel Archange kwisaka tala munu mpe tubaka na munu tí mu ke kuzwa kivumu, kukonda kuzaba bakala mosi.”

28 Ntangu yayi, kana Joseph lendaka vutuka na Masonuku, profete tubaka tí yawu lendaka salama! Yawu vwandaka kaka Nzambi ke tendula Ndinga na Yandi Mosi! Beno me mona? Kasi yawu vwandaka kima yina vwandaka salama ve.

29 Yawu yina diambu ya konso nsungi. Ndinga ya Nzambi kele nzenza samu na bantu; Yawu kele ya kukonda kumesana. Ntangu nionso Nzambi ke salaka yina ke salamaka ve. Kisika nionso Nzambi kele yawu ke vwandaka kaka ya kukonda kumesana. Yawu ke telemina mambu ya yinza, samu bawu ke salaka mambu na mutindu na bawu. Kasi Nzambi ke kwisa mpe ke sala yina ke salamaka ve.

30 “Yinki mutindu mwensé yayi lendaka kuzwa kivumu?” Yandi vwandaka muntu ya kieleka, yandi sosaka Nzambi samu na yawu.

31 Mpe Nzambi tubaka na yandi na ndosi, mpe tubaka na yandi tí, “Joseph, nge mwana ya David, kuvwanda na boma ve na kubaka Marie mutindu kento na nge, yina me kuzwa kivumu na Mpeve-Santu. Nzambi fikaka yandi na kivudi na yandi. Tala yina salaka yawu.”

32 Beno me bakulaka yinki mutindu Nzambi salaka na Joseph kuna? Na nzila ya zole, na nzila ya ndosi. Ntangu yayi, beto ke zaba tí bandosi kele, beto ke kwikilaka na bandosi. Mu ke kwikilaka na bandosi. Vwandaka . . . Nzambi na ntangu nionso ke salaka na bantu na nzila ya bandosi. Kasi bandosi kele na kisika ya zole, beno me mona, yawu lunga vwanda ya kieleka to ya luvunu kaka kana yawu me tendusama. Kasi yawu vwandaka na nsatu ya ntendulu ata mosi ve. Yawu vwandaka Nzambi Yandi mosi ke tuba mbala mosi na Joseph, samu kuvwandaka na profete ve na ntoto samu na kutendula na bilumbu na bawu. Kuna vwandaka na profete mosi ve bamvula nkama yiya. Yankaka ya kulutila mbote, yina Nzambi salaka, samu na mambote ya Mwana na Yandi Mosi, tubaka na Joseph na nzila ya ndosi mpe kukonda ntendulu. Yandi tubaka, “Kento yayi kele ya kusungama. Mwana yina ya Santu me salama na kati na yandi kele Mwana ya Nzambi.” Yawu vwandaka na nsatu ya ntendulu mosi ve.

33 Nzambi ke sala ntendulu na Yandi Mosi na bantima ya kusungama, ya kieleka. Babakala na bakento yina ke tala na kima yina ya mansweki, kana beno ke ya kusungama mpe na kieleka mpe beno ke kwikila, Nzambi kele na mutindu ya kutendula yawu na beno. Ntete, zaba kana yawu kele nsilulu. Kana Joseph talaka mbote mpe kwendaka ntama ya binkulu mpe vutukaka na Biblia, mpe yandi lungaka bakula tí, Esaie tubaka tí mwensé ke sala mutindu yina.

34 Mpe bima yina bawu zabisaka na ntwala, mpe lubutuku na Yandi, mpe nionso yina tubamaka na Masonuku, “na nzila ya ba profete ya santu,” mutindu Pierre tubaka. Mpe ata muntu

ve kele na muswa ya kuyika ntendulu na yandi mosi. Kele kaka yina Nzambi tubaka ke salama. Yandi vwandaka kumonisama ya Ndinga ya Nzambi yina silamaka samu na kilumbu yina. Nzambi tubaka yawu, mpe yawu salamaka. Yina sukisaka yawu.

<sup>35</sup> Yesu tubaka. . . Ntangu Yandi vwandaka na zulu ya ntoto, na ntangu bawu lendaka bakula ve kisalu na Yandi, yawu vwandaka ya nkembo mingi, ya ngitukulu mingi, (bawu lungaka ve), ya ngitukulu, na nionso. Bawu lendaka ve kubakula Yandi. Yandi tubaka, “Beno tala na Masonuku!” (Mu ke banza tí mu ke tula na beno makelele ve kuna na nganda, na kunganaka kuna.) “Beno tala Masonuku, samu na yawu beno ke baka Luzingu ya Kukonda nsuka, mpe Yawu ke tuba kimbangi na Munu.” Beno me mona? “Yawu Mosi ke tuba na beno Nani Munu kele.”

<sup>36</sup> Beno me mona, Nzambi kabulaka Ndinga. Na kilumbu yina vwandaka kumonisama ya Nzambi, Nzambi (Emmanuel) kele na beto, “Nkumbu na Yandi ke vwanda ya Kulutila kitoko, Konsense, Mwana-ntinu ya Ngemba, Nzambi ya Ngolo, Tata ya Kukonda nsuka. Mpe Nkumbu na Yandi ke vwanda *Emmanuel*, ‘Nzambi kele na beto.’” Nzambi vwandaka na kati ya David. Nzambi vwandaka na kati ya Moize. Nzambi! Yawu vwandaka Nzambi na ntangu nionso, vwandaka kukimonikisa Yandi mosi na nsungi yina. Kasi samu na nsungi yayi, “Mwensé mosi ke kuzwa kivumu mpe yandi ke buta Mwana ya bakala, mpe Yandi ke vwanda Nzambi na beto.”

<sup>37</sup> Tala kikuma bawu komaka Yandi na kulunsi, samu tí Yandi mosi vwandaka kukisala Nzambi, mpe vwandaka zitisa ve Saba. Yandi vwandaka—Yandi vwandaka Nzambi ya Saba, mpe Yandi vwandaka Nzambi. Mpe Yandi vwandaka ve muntu mutindu bantu nionso to profete mosi mutindu profete nionso (ata ti Yandi vwandaka Muntu mutindu bantu nionso mpe Profete), kasi Yandi vwandaka Nzambi-Profete. Mpe Yandi vwandaka kulungisama ya Ndinga, ya kieleka mutindu Nzambi tubaka tí Yandi ke sala. Yandi tubaka, “Nani na kati na beno lenda bedisa Munu na disumu? Beno tala na Masonuku! Na Yawu beno ke kuzwa Luzingu ya Kukonda nsuka, mpe Yawu ke tuba kimbangi na Munu.” Kasi samu na binkulu na bawu, bawu vwandaka zinga na kivudi ya nsemo ya nsungi yankaka.

<sup>38</sup> Mutindu mu vwandaka longa yawu na mwa bilumbu me luta, “*Kuzinga na kivudi ya nsemo.*” Glare kele “kivudi ya nsemo,” mwini yawu mosi ke kukimonisa, mpe yawu kele ya luvunu. Mpe konso kivudi ya nsungi yankaka kele kutadisama ya luvunu. Ntangu nionso bantu ke tambula na kati ya kima yina salamaka ntama. Ba Lutheriens ke tambula na kivudi ya Luther. Nsemo ya Luther vwandaka mbote na kilumbu na yawu; Wesley vwandaka mbote na kilumbu na yandi; Pentecote vwandaka mbote na kilumbu na yandi. Beto ke mata na kikalu, beto ke zinga na nsungi yankaka! Beto ke kwenda na ntwala, ntangu nionso, beto lenda tala diaka na manima ve.

39 Na ntangu beto ke kukipesa na bikalulu na beto, beto ke banza tí mambu nionso ke tambula mbote, beto ke kangama na binkulu na beto; mpe yina vwandaka mbote samu na kilumbu yina, kasi beto ke kwenda na ntwala! Beno tala Masonuku mpe mona yinki silamaka samu na bubu yayi, na yawu beto ke zaba sika wapi beto kele, beto lenda zaba sika wapi beto me telema.

40 Luther; beno lunga tala fioti na Masonuku mpe mona na—na nsungi yina ya Sarde, beno lenda mona mbote-mbote yinki silamaka. Tala yinki mutindu munati-mpunda basikaka, tala yinki kwendaka kutana na yandi, kieleka, “mayele ya yimbi ya muntu,” bangindu ya malu-malu ya dibuundu. Tala Wesley, mpe bayankaka. Mutindu mosi tii kuna na nsungi ya Pentecote, mpe ke luta na nsungi yina, tala yinki mutindu yawu salaka nzietelo. Tala na Masonuku mpe mona sika wapi beto kele. Kikuma yawu yina Yesu tubaka ti, “Beno tala na Masonuku!”

41 Tala sika wapi beto kele! Mu ke kwikila tí beto kele na Kwizulu ya Mwana ya Nzambi na ntangu yayi. Mu ke kwikila tí beto ke na nsungi yina Yandi lenda monika na konso ntangu yina. Mu ke kwikila tí Masonuku ke tuba tí, beto kele na bantangu ya nsuka ya masolo ya yinza yayi. Mu lenda mona mambu mutindu yawu ke salama. Tala Conseil Oecumenique ke twadisa mabuundu nionso na kati na yawu, na kati ya kidimbu ya niama. Mpe tala Luyalu ya Rome mpe yina yawu ke sala, mpe nionso yankaka. Mu ke mona bawu ke vukana, na kufikaka Nsemo, ke telemina Nsangu ya mbote. Muntu nionso ke kota na kati na yawu mpe ke tambula na kati ya nsemo na bawu to beno ke tambula ve ata mbala mosi. Beno me mona, beto ke na ntangu ya nsuka. Kele na kima mosi ve me bikala samu na beto kasi beto ke tala kaka na Nzambi mpe ke kwikila Ndinga na Yandi. Ndinga kele ntangu nionso ya kieleka.

42 Na kati ya nsungi ya dibuundu ya Laodicée, nsungi mosi kaka ya dibuundu, na nionso na yawu, yina Klisto vwandaka na nganda ya dibuundu. Yandi vwandaka na nganda, ke kokotila. Yinki salamaka? Conseil Oecumenique ke tula Yandi na nganda. Biblia ke tuba tí Yandi vwandaka na nganda, mpe Yandi kele. Yinki yawu ke manga na kukotisa? Ndinga. Mpe Yandi kele Ndinga, Yandi ke vwandaka ntangu nionso Ndinga, mpe Yandi kele kaka Ndinga na nokokila yayi! Yandi kele Ndinga.

43 Biblia ke tuba, “Ndinga kele ya makasi mingi, ya ngolo mingi mutindu mbele ya meno zole,” na buku ya ba Hebreux, kapu 4, “yina ke zaba mabanza mpe bangindu ya ntima.” Tala yina Ndinga vwandaka! Bawu lungaka zaba Nani Yandi vwandaka na ntangu Yesu tubaka yawu na kilumbu yina.

44 Tala yinki Yandi salaka. Kilumbu mosi Yandi telemaka kuna, na mbatukulu ya kisalu na Yandi. Kuvwandaka na bakala mosi yina kwisaka na Yandi, na Nkumbu ya Simon, Simon Pierre. Mpe na ntangu Pierre talaka Yandi mpe—mpe monaka Yandi,



Yesu tubaka na yandi, “Nkumbu na nge kele Simon mpe nge ke mwana ya Jonas.” (Yandi zabaka ti Moize tubaka, “Mfumu Nzambi na beno ke basisila beno Profete mosi mutindu munu, mpe beno lungaka kaka kuwa Yandi.”) Mpe tala Muntu yina me monaka yandi ntete ve na luzingu na Yandi, tubaka na yandi, “Nkumbu na nge kele Simon mpe nge ke mwana ya Jonas.” Samu na yinki, yandi zabaka mbote tí yina lenda vwanda kaka. . . Bawu vwandaka ve na profete bamvula nkama, mpe tala Muntu yina zabisaka yandi nani yandi vwandaka. Na ngitukulu ve yandi lungaka ndima yawu!

<sup>45</sup> Philippe, na ntangu yina, kwendaka mpe—mpe monaka Nathanael na nsi ya yinti, mpe nataka yandi na Yesu. Yesu tubaka “Tala Israelite yina na kati na yandi luvunu kele ve.”

Yandi tubaka, “Rabbi, yinki ntangu Nge zabaka munu?”

<sup>46</sup> Yandi tubaka, “Na ntwala Philippe kubokila nge, ntangu nge vwandaka na nsi ya yinti, Mu monaka nge.”

<sup>47</sup> Yandi tubaka, “Rabbi, Nge ke Mwana ya Nzambi! Nge ke Ntinu ya Israel.” Yandi zabaka ti yawu vwandaka Yandi! Yinki? Yawu vwandaka na nsatu ya ntendulu mosi ve, Yehowa tubaka yawu!

<sup>48</sup> Bayankaka kuna kwikilaka na yawu ve. Bawu tubaka, “Muntu yayi ke Belzebul. Yandi ke—Yandi ke na mwa mayele ya kubendila mabanza. Yandi—Yandi ke nganga-nkisi, to kima mosi mutindu yina.”

<sup>49</sup> Yesu talaka bawu, mpe tubaka, “Ya kieleka, kana beno tuba diambu mosi ya yimbi na Mwana ya muntu, yawu ke loluka beno. Kasi na ntangu Mpeve-Santu ke kwisa sala kima mosi yina, kutuba diambu ya yimbi samu na Yandi, yawu ke lolukila beno ata fioti ve, na yinza yayi to na yinza yina ke kwisa.” Yandi vwandaka pesa profesu samu na kilumbu na beto, kilumbu beto ke lenda mona. Samu Yandi ke mutindu mosi mazono, bubu yayi, mpe kukonda nsuka.

Bambuka moyo, yawu vwandaka Yesu Klisto yina vwandaka na kati ya Moize.

<sup>50</sup> Yawu vwandaka Yesu Klisto yina vwandaka na kati ya David. Na ntangu David, mwana ya . . . David kwendaka na zulu ya mongo, Ntinu yina losamaka, mpe dilaka samu na Jerusalem, yina vwandaka kima yankaka ve kasi Klisto kati na yandi. Bamvula nkama na nana na manima, Mwana ya David telemaka na zulu ya Mongo ya Olive mpe talaka Jerusalem mpe dilaka, mpe tubaka, “Jerusalem, Jerusalem, mbala yikwa Mu lendaka bumba nge mutindu nsusu lunga bumba bana na yandi, kasi nge zolaka ve!”

<sup>51</sup> Ntangu Joseph vwandaka na boloko, yina vwandaka Yesu. Ntangu yandi tekisamaka na makumi tatu ya mpata, yina vwandaka Yesu. Na ntangu yandi kumaka muntu ya Potiphar,

yina vwandaka Yesu. Na ntangu yandi vwandaka na diboko ya kibakala ya Pharaon. Mpe na ntangu yandi vwandaka telema, bantu nionso . . . na ndinga ya mpungi, mpe bantu nionso vwandaka fukimina, yina vwandaka Yesu. Muntu mosi ve lenda kwisa na Pharaon kaka na nzila—nzila ya Joseph; muntu mosi ve lenda kwisa na Nzambi, kaka na nzila ya Yesu. Yawu vwandaka Yesu, Ndinga ya profesu keke na kulungisama, yina tubamaka na bivudi mpe bifwanisu.

<sup>52</sup> Ntangu Yesu vwandaka awa na ntoto, Yandi salaka kima mosi yina ba profete salaka, kikuma yawu yina bawu zabaka tí Yandi vwandaka kumonisama ya Nzambi samu na Ndinga na Yandi. Yina vwandaka na nsatu ya ntendulu ve.

<sup>53</sup> Ntangu Nathanael monaka yayi, yandi bwaka na ntoto, yandi tubaka, “Nge ke Ntinu ya Israel, Mwana ya Nzambi, Ntinu ya Israel. Beto zaba Nge, ata muntu mosi ve lunga sala mambu yayi.”

<sup>54</sup> Nicodeme kwisaka na mpimpa, mpe tubaka kima mosi yina samu na ba Pharisians. Kasi, beno ke mona, bawu vwandaka ya kukangama na Conseil Oeucumenique yawu yina bawu lungaka ndima Yawu ve. Yandi tadisaka yina bawu tubaka, yandi tubaka, “Rabbi, beto . . .” “Beto” keke nani? Conseil na bawu! “Beto zaba tí Nge ke longi yina me katuka na Nzambi, samu ata muntu mosi ve lunga sala mambu yayi kana Nzambi keke na Yandi ve.” Bawu ndimaka Yawu, bawu zabaka yina Yawu vwandaka, kasi bawu vwandaka ya kukangama na kati na yawu.

<sup>55</sup> Mpe Nzambi, bamvula makumi yiya me luta, nikisaka yinsi yayi na mbotika ya Mpeve-Santu, mpe babakala na bakento ke bikala kaka na nganda na Yawu samu bawu keke ya kukangama na kati ya kima ya mutindu mosi, na kuzingaka na kivudi ya nsemo ya kilumbu yankaka. Wapi diambu? Konso muntu zola vwanda Methodiste, Baptiste, Presbiterien, Lutherien, to kima ya mutindu yina. Beno me mona, yawu ke kivudi ya nsemo.

<sup>56</sup> Bawu vwandaka zinga na kivudi ya nsemo ya kilumbu ya Moize. Yinki Yandi tubaka? Yandi tubaka . . . Bawu tubaka, “Beto ke bilandi ya Moize.”

<sup>57</sup> Yandi tubaka, “Kana beno zabaka Moize, beno lungaka zaba Munu. Moize sonikaka samu na Munu!”

<sup>58</sup> Kana beno zabaka Luther, beno lendaka zaba nsungi yayi! Kana beno zabaka nsungi ya ba Methodiste, beno lendaka zaba nsungi yayi! Klisto sonikaka samu na nsungi yayi! Ndinga yina ke lungisama ke monisama na nsungi yayi. Yawu ke na nsatu ya muntu ve samu na kutendula Yawu, Nzambi ke sala ntendulu na Yandi Mosi. Nzambi ke kukitendula Yandi mosi, samu Yandi ke Mosi kaka yina lenda tendula Yawu. Bansilulu ya Nzambi ntangu nionso ke ndimisaka yina Yandi tubaka, mpe yawu yina keke ntendulu.

59 Ntangu yayi, Yesu, (samu na kukonda kulutisa ntangu), Yesu tubaka, na Santu Jean, na kapu 14, nzila ya 12, “Yandi yina ke kwikila na Munu, mambu Mu ke sala yandi mpe ke sala yawu.” Yandi tubaka yawu? Ya kieleka. Yina ke na nsatu ya ntendulu mosi ve. Na ntangu muntu mosi ke sala kosalu yango, yina kele Nzambi. Ya kieleka!

60 Yandi tubaka diaka kuna, “Mutindu yawu vwanaka na bilumbu ya Lot, mutindu mosi yawu ke vwanda na kwizulu ya Mwana ya muntu.” Yesu tubaka yawu. Yandi tubaka yawu? Ya kieleka, Yandi tubaka yawu! Yawu ke na nsatu ya ntendulu ve.

Bawu ke tuba, “Mbote, yina tubaka . . .”

61 Ya kieleka yawu songidilaka yina Yandi tubaka! “Mutindu yawu vwanaka na bilumbu ya Lot, mutindu yina yawu ke vwanda na kwizulu ya Mwana ya muntu.” Yinki salamaka na bilumbu ya Lot? Beto vutuka na manima na mwa ntangu fioti, samu na kubakula yina bawu vwanaka sala.

62 Kuvwandaka na mitindu tatu ya bantu na bilumbu ya Lot: mukwikidi, mukwikidi ya kati-kati, mpe mumpáni. Yina ke mutindu mosi, na konso nkangu ya bantu.

Beto zaba tí bantu ya Sodome vwanaka mimpani.

Lot vwanaka mukwikidi ya kati-kati.

63 Abraham vwanaka mukwikidi. Yandi vwanaka nsilulu yina ndimisamaka. Yandi vwanaka yina vwanaka vingila mwana ya nsilulu. Yandi vwanaka yina vwanaka vingila yawu na lukwikilu. Amen. (Munu ke “amen ve” munu mosi. *Amen* zola tuba “Yawu vwanda mutindu yina!”) Mpe yina ke ya kieleka. Abraham vwanaka ve na Sodome. Abraham vwanaka na zulu mpe na nganda ya Sodome. Yandi ke kifwanisu ya Dibuundu ya kimpeve bubu yayi.

64 Lot ke kifwanisu ya dibuundu ya denomination kuna na Sodome. Tala, Biblia tubaka tí, “Masumu ya Sodome vwanaka yangisa moyo na yandi konso kilumbu.” Samu na yinki yandi vwanaka na ngolo ve ya kutelemina yawu? Kele na bantu ya mbote yina me vwanda na yinzo-Nzambi mosi bubu yayi, bawu ke tala mpe ke mona bakento me lwata bakupe mpe babakala ke sala mambu yayi, mpe bakwikidi na bawu, ke bula nsaka ya golf na Lumingu, mpe pikiniki, mpe ke zengisa bamasa mpe bima ya mutindu yina, na kisika ya kukwenda na yinzo-Nzambi. Bawu ke bikala na yinzo na Kilumbu ya tatu na nkokila, na kutalaka television, na kisika kukwenda na yinzo-Nzambi. Bawu zola tuba na yawu kima mosi, kasi conseil lenda tula bawu na nganda. Wapi diambu? Yawu kele Lot diaka, ke tala na nela na yandi mpe ke mona disumu, mpe ke banga na kubokila disumu “disumu”!

65 Abraham vwanaka ve na kati ya mvwanzi na bawu, yandi vwanaka na nganda na yawu. Yandi vwanaka kifwanisu ya Dibuundu ya kimpeve. Ntangu yayi tala yinki salamaka na

ntangu ya nsuka, kaka na ntuala ya kubwa ya tiya. Mpe yina vwandaka Bantu ya makanda. Yawu vwandaka kidimbu mosi tí tiya ke kubwa na zulu ya yinza ya Bantu ya makanda bubu yayi, na ntangu bimfumu ke kubwa mpe yawu ke yokama tiya. “Mazulu ke vwanda na tiya,” Mfumu tubaka, “bawu ke yokama na tiya yina ya ngolo.” Yina vwandaka kifwanisu na yawu.

<sup>66</sup> Ntangu yayi beto baka bifwanisu na bawu. Tala Abraham yina vwandaka kaka na nganda, na Sodome ve, yandi vwandaka na nganda ya Sodome. Lot vwandaka zinga na Sodome.

<sup>67</sup> Kima ya ngitukulu, na suka mosi ya mwini ya ngolo, kaka na ngunga ya kumi na mosi yawu lendaka vwanda, yandi monaka babakala tatu ke kwisa, babakala mutindu bantu nionso, ke tambula na bala-bala, na mwa nzila mosi. Abraham vwandaka na nsi ya yintí ya wengé, ke pema yandi mosi. Yandi vwandaka na nganda, mbala yankaka kumosi na bitwisi na suka yina, yandi kele, na kutala mbote yawu vwandaka na midi. Mpe yandi monaka babakala tatu ke kwisa. Mpe kuvwandaka na diambu mosi samu na bantu yina, tí, ngunga bulaka. Oh, la la!

<sup>68</sup> Ntangu nionso kele na diambu mosi samu na Nzambi, na ntangu Yawu ke kwisa na kati ya bantu, Yawu ke bula ngunga. Bawu zaba Yawu. Kele na kima mosi ke tubila bawu tí, kele na kudedama mosi kuna.

<sup>69</sup> Abraham kwendaka nswalu, mpe tubaka, “Mfumu na munu, lutila awa mpe bika ti mu baka mwa masa, mu nata yawu mpe mu sukula makulu na Nge, mpe mu pesa na Nge kitini ya dimpa, na manima Nge lenda kwenda, nzila na Nge.” Yandi balukaka na lweka. Yandi kwendaka nswalu na kati ya bitwisi mpe bakaka mwana ya ngombe ya mafuta mpe fwaka yawu, tubaka na musadi mosi na kuyidika yawu. Yandi kwendaka na kati ya tenta, na manima na yandi, mpe zabisaka Sarah na kunika ndambu ya faline, samu, to kusala mwa madia, kusala mampa, mpe ba gateau. Yandi nataka yawu mpe kabulaka yawu. Na ntangu bawu vwandaka kuna, ke dia, bawu bandaka na kumona tí, Muntu yayi vwandaka tala kaka na Sodome. Mpe Yandi tubaka . . .

<sup>70</sup> Zole na bawu, beno bambuka moyo, kulumukaka na Sodome. Zole kwendaka na Sodome. Na luzitu nionso beno konda yayi ve. Mu ke fwanikisa yawu na yina Yesu tubaka. Zole kati na bawu kwendaka na Sodome samu na kubasisa Lot mpe bayina nionso vwandaka ya kuyilama na kubasika kuna. Mpe zole yina kwendaka kuna, kulumukaka mpe longaka. (Mpe vwandaka na Mosi yina bikalaka na manima kuna na Abraham. Tala kidimbu Yandi salaka.) Bawu bakaka kidimbu mosi kuna, kuvwandaka . . . bantu ya Sodome kufwaka meso. Kulonga Nsangu ya mbote ke fwa meso ya mumpani ntangu nionso. Mpe bakula yinki salamaka.

71 Ntangu yayi, kele na Mosi yina telemaka na manima awa mpe salaka kidimbu mosi na ntwala ya Abraham.

72 Ntangu yayi, beno me bakula? Konso muntu ya masolo, talulula Masonuku, talulula dilongi ya masolo, yawu me vwandaka ntete ve na kati ya nsungi ya dibuundu kuna mabuundu ya denomination na yinza ya muvimba, kuna na ba denomination, muntu mosi ve yina nkumbu na yandi sukaka mutindu Abraham, h-a-m, ata mbala mosi ve ntete. Kasi bubu yayi bawu ke na mosi, G-r-a-h-a-m. Ya kieleka. Yandi ke kulumuka kuna, ke bokila bawu na kubasika. Yandi ke sala kisalu mosi ya mbote mingi. Graham, Billy Graham, musadi ya Nzambi kuna na kati ya ba denomination, bantu ya politiki, mpe bawu nionso, ke nwanisa yawu.

73 Kilumbu yina na ntangu bawu zolaka tí yandi vwanda mosi na kuponama ya Ntwadisi ya yinsi, yandi mangaka yawu na ngolo nionso. Nzambi, sakumuna yandi samu na yawu. Samu na yinki, ba kompani na bawu ya whisky, yandi lendaka ata fioti ve kubaka kisika ya ntete mutindu yawu lungaka vwanda. Bawu bebisaka fundu mosi ya ba million ya ba dollars, samu yandi lungaka basisa bawu na nganda konso mutindu yina, ba kompani yina ya makaya mpe mambu ya mutindu yina. Tala, yandi ke kuna mutindu munati-nsangu ya Nzambi na bantu ya Sodome. Ya kieleka.

74 Kasi beno bambuka moyo, kuvwandaka na Mosi yina bikalaka kuna na Abraham, Muntu yankaka, zola yina ve kwendaka kuna mutindu ba evangeliste ya bilumbu yayi yina kwendaka longa kuna. Zaba tí, kuvwandaka na Mosi yina telemaka kuna. Zole kulumukaka *kuna*, mpe Mosi bikalaka *awa* na Abraham. Mpe Mosi yina bikalaka na Abraham pesaka yandi kidimbu mosi.

75 Ntangu yayi tala mbote tí, nkumbu na yandi vwandaka “Abram” mpe kento na yandi vwandaka “Sarai,” kaka kilumbu mosi to zole na ntwala ya yina. Nzambi monikaka na yandi mpe tubaka na yandi, “Mu ke soba nkumbu na nge ntangu yayi kubanda na Abram tii na Abraham.” (Tala, G-r-a-h-a-m kele na bisono sambanu, muntu.) Kasi A-b-r-a-h-a-m kele sambwadi, bisono sambwadi; h-a-m, ke suka na h-a-m.

76 Ntangu yayi, awa na Dibundu ya kimpeve, vwandaka na Mosi kwisaka na Abraham, mpe yandi bakulaka yinki Yandi tubaka. Yandi tubaka, “Abraham,” (“Abram” ve) “Abraham, wapi kento na nge” (“S-a-r-r-a” ve) “S-a-r-a-h? Wapi kento na nge Sarah?”

77 Tala yinki yandi tubaka, “Yandi ke na kati ya tenta na manima na Nge.”

78 Mpe Yandi tubaka, “Mu ke kwisa tala nge. Mu ke kwisa tala nge.” Tala kiyingilu kimuntu yayi, Yandi, na mutindu ya nsilulu

yina Yandi salaka. Yina vwandaka Nzambi! Yandi tubaka, “Mu ke kwisa tala nge.”

<sup>79</sup> Mpe Sarah, (na mutindu beto nionso lenda bakula) sekaka na kinsweki, yandi mosi, yandi tubaka, “Munu, kento ya mununu, ya bamvula nkama mosi, mfumu na munu” (yina vwandaka Abraham) “mununu diaka, yina me luta ntangu na yandi ya kintwenia.” Yandi tubaka, “Samu, beto lenda vwanda diaka ve na nzala ya nzutu, mu ke mununu mpe yandi ke mununu.” Mpe tubaka, “Beto lenda vwanda na yawu diaka ve.” Mpe yandi tubaka, “Yinki mutindu? Mambu yayi lenda salama ve!”

<sup>80</sup> Mpe Muntu yayi (Nzambi na nzutu ya muntu) tubaka, “Samu na yinki Sarah me seka mpe me tula ntembe, na kutubaka mambu yayi?” Na kati ya tenta na manima na Yandi.

<sup>81</sup> Ntangu yayi tala, kana yina ke mutindu mosi ve na kisalu yina Yesu Klisto vwandaka na yawu! Yandi talaka bantu mpe zabaka mabanza na bawu. Yandi tubaka na Pierre nani yandi vwandaka mpe yina vwandaka nkumbu ya tata na yandi. Yandi tubaka na Nathanael.

<sup>82</sup> Yandi tubaka na kento yina na dibulu ya masa, na ntangu yandi tubaka. . . Yandi tubaka, “Kwenda bakila Munu masa ya kunwa,” to “Natila Munu masa ya kunwa.”

<sup>83</sup> Yandi tubaka, “Tata, yawu ke kikalulu ve samu Nge solula na . . . beno ba Juif kusolula na bantu ya Samarie. Beto ke na kimpangi ve kati na mosi na yankaka.”

<sup>84</sup> Yandi tubaka, “Kasi kana nge zabaka na Nani nge ke tuba, nge lungaka lomba Munu masa ya kunwa.” Disolo kwendaka na ntwala. Yandi tubaka, “Kwenda bokila bakala na nge mpe beno kwisa awa.”

Yandi tubaka, “Mu ke na bakala ve.”

Yandi tubaka, “Nge me tuba mbote, samu nge vwandaka na bawu tanu.”

Yandi tubaka, “Tata!”

<sup>85</sup> Tala luswaswanu kati-kati na yina mpe—mpe ba banganga-nzambi ya kilumbu yina, kimvuka yina vwandaka zinga na kivudi ya nsemu ya kilumbu yankaka. Bawu tubaka, “Yawu ke diabulu!” Bawu lendaka pesa kaka mvutu na kimvuka na bawu, samu yawu lombaka mvutu mosi.

<sup>86</sup> Kasi yinki mwa kento yayi ya mputu salaka, yina vwandaka na Mbuma yina zabanaka na ntwala na ntima na yandi. . . Yandi kumaka mbevo mpe ya kulemba samu na kimvuka yina, yandi zingaka mutindu kento ya pité. Kasi na ntangu yandi monaka Yina, yandi tubaka, “Tata, mu ke mona tí Nge ke Profete. Beto me zwaka mosi diaka ve bamvula nkama yiya me luta, mpe beto me longukaka tí na ntangu Mesiya ke kwisa Yandi ke sala mambu yayi.” Oh, la la! Mbuma yina vwandaka kuna bakaka luzingu! Samu na yinki? Yawu vwandaka na nsatu ya ntendulu ve.

87 Yesu tubaka, “Mu ke Yandi yina ke tuba na nge.” Yina vwandaka na nsatu ya ntendulu ve. Yandi salaka kimangu mpe ndimisamaka tí Yina ke Mesiya, amen, mpe simbaka mbote-mbote yinki Nzambi silaka (“Mfumu Nzambi na beno ke basisila beno Profete mosi mutindu munu,” mutindu Moize tubaka). Yinki yawu vwandaka? Kundimisama ya Masonuku!

88 Yandi bakaka ntinu na kati ya mbanza, mpe tubaka, “Beno kwisa, tala Bakala mosi Yina me tuba na munu mambu yina mu salaka. Yayi ke Klisto ve? Yayi ke Yandi ve? Yandi me tuba na munu yina mu salaka.”

89 Beno bakula ntangu yayi, Yesu, yina vwandaka Yandi kuna na kati ya Muntu yina balulaka mukongo na Yandi na tenta mpe tubaka yinki Sarah vwandaka banza na kati ya tenta.

90 Ndinga ya Nzambi ke tuba, na buku ya ba Hebreux, na kapu 4, tí . . . Yandi ke tuba mutindu yayi, “Ndinga ya Nzambi kele na makasi mingi mpe ya meno mingi mutindu mbele ya meno zole, yawu ke kota na kati ya buntofo ya mikwa, mpe ke bakula mabanza mpe banzala ya ntima.” Yawu ke Ndinga! Mpe na konso ntangu profete ke kwisa, yandi ke kwisa na Ndinga, mpe yandi vwandaka Ndinga samu na nsungi yina. Mpe yinki yawu salaka? Profete yina zabaka mabanza yina vwandaka na kati ya ntima.

91 Yawu salamaka na Yesu Klisto samu Yandi vwandaka muvimba ya Ndinga.

92 Mpe Yesu tubaka, “Mutindu yawu vwandaka na bilumbu ya Sodome, yawu ke vwanda mutindu mosi na kwizulu ya Mwana ya muntu.” Mpeve ya Nzambi lunga kwisa na zulu ya ntoto na nzutu ya bantu, Nzambi monisamaka na nzutu ya muntu (Amen! Beno ke mona yawu?), mpe lunga sala kima mosi yina Nzambi salaka na nzutu ya muntu kuna na Sodome. Bambuka moyo, bawu vwandaka vingila mwana ya nsilulu. Mpe, kaka na manima ya yina, mwana ya nsilulu kwisaka. Yina vwandaka kidimbu ya nsuka ya Sodome mpe kimvuka ya Abraham monaka na ntwala ya kwizulu ya mwana ya nsilulu. Beno me bakula yawu? Mpe ntangu yayi Dibuundu ya kimpeve kwisaka na ntangu yina.

93 Muntu mosi tubaka, “Mpangi Branham, nge ke tuba tí ‘yina vwandaka Nzambi?’”

94 Biblia ke tuba ti, Yawu vwandaka Nzambi! Yawu ke na nsatu ya ntendulu ve. Yandi kele Elohim. Mutindu yina Abraham bokilaka Yandi. Konso muntu yina ke tangaka Biblia zaba yawu. *Elohim*, “yina me lunga na yandi Mosi.” Yandi vwandaka ya Ntete, ya Nsuka; Mbatukulu, Nsuka. Elohim! Abraham bokilaka Yandi “Elohim.” Nzambi (na bisono ya nene na ki-Hebreux), Elohim; kaka mutindu, “Na mbatukulu Nzambi,” Elohim.

95 Yandi vwandaka Elohim yina monikaka na nzutu ya muntu, ke lwata bilele ya bantu, ke dia madia ya bantu. Amen! Kidimbu mosi ya bilumbu ya nsuka tí Nzambi ke monika diaka na kati

ya bantu na Yandi na nzutu ya muntu! Amen! Yesu tubaka, “Beno mpe ke sala bisalu yayi mu ke sala. Mpe mutindu yawu vwandaka na bilumbu ya Sodome, mutindu mosi yawu ke vwanda na kwizulu ya Mwana ya muntu.” Amen! Yina ke na nsatu ya ntendulu ve; yawu ke na nsatu ya kumonisama, yawu ke na nsatu ya yina kaka. Amen. Beno ke kwikila yawu?

Beto kulumusa bayintu na beto.

<sup>96</sup> Tata na beto ya Mazulu, beto ke pesa na Nge nsilulu na Nge na nkokila yayi tí Nge tubaka mambu yayi. Nge silaka yawu. Kele na muntu mosi ve yina lenda zingisa Ndinga na Nge kasi Nge mosi kaka. Nge tubaka, “Bika nsemo kuvwanda,” mpe nsemo monanaka. Mosi ve lunga tendula yawu, yawu monisamaka.

<sup>97</sup> Mutindu beto tangaka profete, Esaie, “Mwensé mosi ke kuzwa kivumu,” yandi zwaka kivumu; yawu ke na nsatu ya kumonisama mosi ve, yandi zwaka yawu. Yawu yina salamaka.

<sup>98</sup> Nge tubaka, na ntangu Yandi ke kwisa Yandi ke butuka na Bethlehem, “Na Bethlehem, na Judée. Nge kele ve ya kulutila fioti na kati ya bambanza ya Judée, ya Israel? Kasi na nge ke basika Mfumu ya bantu ya Munu.”

<sup>99</sup> Bima yina Yandi ke sala, yinki mutindu Yandi ke boka na kulunsi, yinki mutindu bawu ke bedisa Yandi, bawu ke tobula makulu na Yandi mpe maboko na Yandi; “Yandi lwalaka samu na masumu na beto, mpe waka mpasi samu na masumu na beto ya nkú; mpasi yina ke pesa beto ngemba kubwaka na zulu na Yandi; na bamputa na Yandi beto me beluka.”

<sup>100</sup> Mutindu David tubaka tí, “Mu ke bika ve moyo na Yandi na difelo, Mu ke pesa muswa ve ti Santu na Munu Yina kupola.” Mpe na kilumbu ya tatu, na ntwa ya banguna makumi sambwadi na zole nzutu na Yandi lungaka kupola, Ndinga ya Nzambi tubaka, “Yandi ke vumbuka na lufwa.” (Bawu tubaka tí bawu yibaka nzutu ya Yandi; bawu ke kwikilaka kaka mutindu yina.) Kasi beto ke kwikila, Mfumu, Ndinga na Nge! Yawu monisamaka. Yesu Klisto vumbukaka na lufwa mpe Yandi tubaka, “Mu ke . . . Tala, Mu ke na beno ntangu nionso, tii na nsuka ya ntoto.”

<sup>101</sup> Beto ke kwikila tí Nge kele awa na nkokila yayi. Beto ke kwikila tí Nge ke kaka Yesu Klisto mosi yina na nkokila yayi, awa, mutindu Nge vwandaka ntete. Mpe Nge ke sosa kaka meso, maboko, makulu, yinwa, bamoyo, banzutu, yina Nge lenda sadila samu na kukimonisa Nge mosi. Nzambi, santisa beto na nkokila yayi, tí beto lunga mona Yesu Klisto yina ke zinga na kati na beto. Bika tí Yandi kwisa! Na yawu beto ke kuma, mutindu ba Grec yina vwandaka na nzala yina kwisaka kilumbu yina, mpe tubaka, “Tata, beto zola mona Yesu.” Mpe bawu kwendaka samu na kumona Yandi. Oh, yinki boma yawu lendaka vwanda na ntangu bawu monaka Yandi!



<sup>102</sup> Nzambi, Nge ke mutindu mosi bubu yayi. Mpe Nge silaka tí kana beto ke na nzala beto lunga mona Nge. “Kaka na ntangu fioti, mpe bantu ya yinza yayi ke mona Munu diaka ve” (mumpani); “kasi beno ke mona Munu diaka, samu Mu ke vwanda na beno, mpe na kati na beno, tii na nsuka ya yinza.” Beto zaba tí Nge ke mutindu mosi mazono, bubu, mpe kukonda nsuka.

<sup>103</sup> Mfumu, Ndinga tubaka yawu, yawu sonamaka, ntangu yayi bika yawu salama, samu na Nkembo ya Nzambi, na kusongisa tí Yandi ke zitisaka Ndinga na Yandi. Amen. Nzambi sakumuna beno.

<sup>104</sup> Mu ke bokila ndonga ya bisambu. Mu ke kwikila tí Billy tubaka ti yandi kabulaka bakalati ya bisambu, kubanda na mosi tii na nkama mosi, to kima mosi ya mutindu yina. Yandi kele awa ve na ntangu yayi. Kele. . . Yinki ke numero ya kalati ya bisambu. . . Muntu mosi kutala na manima ya kalati na yandi. . . Yawu lunga—yawu lunga vwanda numero ya ntete mpe—mpe kisono (A, B, C, D, to. . .). Yinki yawu kele, A? Ya kieleka.

<sup>105</sup> Beto baka A, numero ya ntete, zole, tatu, yiya, tanu. Beno banda na kutelema mutindu yayi. A, numero ya ntete, numero ya zole, numero ya tatu, numero ya yiya. Yiya, mu monaka yawu kutelema ve. Kalati ya bisambu numero ya yiya. Mosi, zole, tatu. Bisambu. . . Mbala yankaka yandi lunga telema ve. Kana yandi lenda telema ve, muntu mosi kutala kalati ya nkalani na yandi, yandi lenda vwanda na kalati kasi yandi lenda telema ve. Na nswalu nionso. Yawu yina, yiya. Tanu, kalati ya bisambu numero ya tanu. Sambanu, sambwadi, nana, yivwa, kumi, kumi na mosi, kumi na zole. Beno kwisa awa na ntwala na ntangu ba ke bokila numero na beno. Numero ya ntete, ya zole, ya tatu, beno luta na lweka yayi. Kalati ya bisambu numero ya ntete, zole, tatu, yiya, tanu, sambanu, sambwadi, nana, yivwa, kumi, kumi na mosi, beno baka bisika na beno. Kumi na mosi, kumi na zole, kumi na tatu, kumi na yiya, kumi na tanu, kumi na sambanu, kumi na sambwadi, kumi na nana, kumi na yivwa, makumi zole, makumi zole na mosi, makumi zole na zole, makumi zole na tatu, makumi zole na yiya, makumi zole na tanu. Kana ke na muntu yina lenda ve. . .

<sup>106</sup> Mu ke mona ntwenia mosi ya bakala na kiti ya bambevo na manima kuna. Kana numero na nge me bokilama, mwana, mpe—mpe kana nge lenda kwisa ve. . . mbote, telemisa kaka diboko na nge, beto ke sala tí beno kwisa awa. Beno me mona?

<sup>107</sup> Yikwa na kati awa ke na kalati ya bisambu ve mpe beno kele mbevo? Beno telemisa maboko na beno, konso kisika yina. Kaka awa, yawu ke mbote, beno telemisa maboko na beno na zulu. Beno ke kwikila? Na ntangu ya bawu ke vukisa yawu, beno ke kwikila Yayi, tí Yandi ke mutindu mosi mazono mpe kukonda nsuka? Yikwa? Beno tala balongi yayi; Masonuku ke tuba ve

bubu yayi, bampangi, tí Yandi ke Mbuta ya ba Nganga-Nzambi yina lenda simbama na nzala ya bimbevo na beto? Ya kieleka? Yikwa ke kwikila yawu, telemisa diboko na nge? Yandi ke Mbuta ya ba Nganga-Nzambi yina lenda simbama na nzala ya bimbevo na beto.

<sup>108</sup> Na yawu kana Biblia ke tuba ti, “Yandi ke mutindu mosi mazono mpe kukonda nsuka,” yikwa ke kwikila yawu? Mbala yikwa Yandi lunga sala yawu bubu yayi? Yandi lenda sala mutindu Yandi salaka mazono. Ya kieleka? Wapi Yandi kele na nkokila yayi? Yandi me vwanda na diboko ya kibakala ya Ngolo ya Nzambi, nzutu na Yandi; Mpeve-Santu kele awa na kati ya yinzo yayi, samu na kumonisa Yandi.

<sup>109</sup> Na yawu, tala ntangu yayi. Yinki salamaka na ntangu muntu yina simbaka nsongi ya lele na Yandi kuna, kento mosi na kilumbu yina? Yandi vwandaka na kalati ya bisambu ve, beto lunga tuba, kasi yandi simbaka nsongi ya lele na Yandi. Mpe na ntangu yandi simbaka nsongi ya lele na Yandi, Yesu balukaka mpe tubaka, “Nani me simba Munu?”

<sup>110</sup> Pierre sungikaka Yandi, mpe tubaka, “Samu na yinki, Mfumu, nge ke tuba mutindu yina. Samu, muntu nionso ke meka na kusimba Nge. Samu na yinki kutuba tí, ‘Nani me simba Munu?’”

<sup>111</sup> Yandi tubaka, “Kasi Mu me bakula tí Mu me lemba.” Yikwa ke zaba yawu? *Vertu*, yina zola tuba “ngolo,” basikaka na Yandi. “Mu me lemba, muntu mosi me simba Munu na mutindu ya luswaswanu.” Mpe Yandi balukaka mpe talaka na kati ya bantu tii Yandi zabaka kisika yina lukwikilu telemaka.

<sup>112</sup> Muntu nionso vwandaka simba Yandi, “O Rabbi, beto ke kwikila Nge,” mpe nionso yina.

<sup>113</sup> Kasi yawu vwandaka na muntu yina kwikilaka Yawu na kieleka. Mpe yandi simbaka nsongi ya lele ya Yandi mpe kwikilaka tí yandi belukaka, samu yandi tubaka na kati ya ntima ya yandi tí kana yandi sala yawu kima mosi lunga salama.

<sup>114</sup> Yandi balukaka mpe talaka na kati ya bantu tii Yandi monaka yandi, mpe Yandi tubaka...tubaka na yandi tí kubasika ya menga ya yandi kangamaka mpe yandi belukaka. Ya kieleka? Ntangu yayi, tala mutindu Yandi vwandaka sala, na ntwala ya bantu.

<sup>115</sup> Ntangu yayi, mu ke kwikila tí Yandi ke ya kufwa ve, Yandi ke zinga bubu yayi mutindu Yandi vwandaka ntete. Mpe Biblia tubaka, Yesu tubaka, Yandi mosi, “Mutindu yawu vwandaka na bilumbu ya Sodome, mutindu mosi yawu ke vwanda na kwizulu ya Mwana ya muntu.”

<sup>116</sup> Beno tala ntangu yayi, konso dikabu yina Nzambi ke na yawu, yawu lenda vwanda kaka na mosi awa, mpe, yina ke pesa mvutu na yawu. Yandi kotaka na mbanza, Biblia ke tuba tí,

“Kuvwandaka na bima mingi Yandi salaka ve samu na kukonda lukwikilu na bawu.” Ya kieleka ve? Diambu ya mutindu mosi bubu yayi. Beno kwikila kaka na Yandi. Beno kwikila kaka na Yandi. Yina ke nzila mosi kaka beno lenda landa.

117 Ndonga ya bisambu me finama? Ntangu yayi, konso muntu vwanda na luzitu na bamuniti kumi. Mu zaba ve kana mu ke kuma na nsuka, mu bakaka bamuniti makumi zole na tanu to makumi tatu ya kutelema kuna. Kasi ntangu yayi, na kati ya ndonga ya bisambu, mosi na mosi ya beno na kati ya ndonga ya bisambu yina zaba tí mu ke nzenza samu na beno, mpe mu zaba kima mosi ve samu na beno, beno telemisa maboko na beno. Muntu nionso na kati ya ndonga ya bisambu.

118 Ntangu yayi na kati ya bantu, yina zaba tí mu zaba diambu ve samu na nge, telemisa diboko na nge. Mbote, ntangu yayi, tala yina mu ke meka na kutuba awa, nkundi na munu, tala. Ntangu yayi, tala. Balongi yayi nionso ya kutelema awa na kisika ya kulonga. Mpe Klisto salaka nsilulu yayi. Beno me mona, yawu me sonamaka. Yinki ntangu yawu lungaka salama? Na bilumbu ya nsuka, kaka na ntuala ya Kwizulu ya Mfumu. Ya kieleka ve? Ke na ntangu yina yawu lendaka salama.

119 Ntangu yayi, yina ke Ndinga yina pesamaka na profesu samu na bubu yayi. Nsemo ya Luther ve; nsemo ya Wesley ve; mpe nsemo ya Pentecote ve. Yawu ke landa nzila na yawu ntangu yayi. Ntangu yayi, Luther ke mbote; Methodiste ke mbote; Baptiste ke mbote mingi; bawu nionso, Pentecote, ke mbote. Kele na bantu ya mutindu na mutindu yina me vwanda awa na nkokila yayi. Yawu kele ve—yawu kele ve—yawu kele bantu ve. Kana . . .

120 Beno lenda tuba ata fioti ve kima mosi na Methodiste samu na Luther, samu yandi ke kwikilaka na luzingu ya busantu kasi Luther ve. Beno me mona?

121 Beno lenda ata fioti ve kutuba na Pentecotiste tí “luzingu ya busantu ke nionso yina me lunga,” samu yandi monaka kuvutuka ya makabu. Yandi ke kwikila yawu ve. Ve, yandi ke na ya mingi kulutila yina. Beno me mona? Mpe yina ke nsungi ya nsuka ya dibuundu yina beto me baka, mpe Biblia ke tuba tí bansungi ya dibuundu ke vwanda diaka ve.

122 Kasi ke vwanda na lukutakanu ya bantu, beno me mona, mpe beto me kuma kisika yango. Ntangu yayi, beno bambuka moyo, kidimbu ya nsuka. Beto ke bantu yina ke sosa mwana ya nsilulu? Telemisa diboko na nge. Beno ke kwikila tí beno ke Mbama ya Abraham na nzila ya Klisto? Telemisa diboko na nge. Na yawu, Mbama ya Abraham, baka kidimbu na nge! Yawu ke na Babylone ve, yawu ke na yinza ya denomination ve. Yawu kele awa na kati na beno, bayina kele na kati ya mvindu yina ve. Beno kwikila yawu!

123 Tala kento yayi awa, yandi ke nzenza samu na munu, beto kele ya bamvula mosi. Mu me monaka ntete ve kento yayi na

luzingu na munu. Kana mu lungaka belula kento yayi mu lenda sala yawu, kana yandi ke mbevo. Mu zaba kima ve samu na yandi. Beno monaka yandi kutelemisa diboko na yandi bamuniti fioti me luta? Mu—mu me monaka yandi ntete ve. Yandi ke kaka kento mosi yina me telema kuna.

<sup>124</sup> Bubu yayi bawu me nata nkuta ya bakalati ya bisambu, bawu vukisaka yawu mpe kabulaka yawu na bantu. Muntu mosi me baka numero ya ntete awa, mpe numero ya kumi kuna na manima, numero ya kumi na tanu, numero ya sambwadi, numero . . . mutindu yina. Bawu ke vukisaka yawu nionso, kaka na ntwala na beno, konso kilumbu. Mpe na ntangu bawu ke bokila, bawu ke bokila kaka na konso kisika yina. Beno me mona? Mpe, ntangu yayi, beno ke na kalati ya bisambu ve, beno vwanda kaka kuna mpe beno kwikila. Samu na yinki beno lenda ve . . .

<sup>125</sup> Tala mbote-mbote nge mosi, na nkokila yayi, bakula ntangu wapi beto ke zinga. Beno me mona? Ntangu yayi, yawu me mana, mpe, nkundi ya munu. Yawu me mana!

<sup>126</sup> Ntangu yayi, kana Nzambi ya Abraham vumbulaka Yesu Klisto na lufwa, mpe Yesu silaka tí na bilumbu ya nsuka bidimbu kaka yina Abraham . . . yina Wanzio (ya kuvwandaka Nzambi na nzutu ya muntu) salaka na ntwala ya Abraham, kaka na ntwala ya kwizulu ya mwana ya nsilulu, Yesu tubaka tí kima mosi lenda salama bubu yayi.

<sup>127</sup> Ntangu yayi, beto ke mona baminduki ya ba atome mpe ba denomination, mpe nionso yina, mpe mvindu kisika bawu kele. Beto ke mona Billy Graham kuna, mpe Oral Roberts, mpe bantu nionso kuna; binati-nsangu ya Pentecote mpe binati-nsangu ya ba denomination kuna, beto ke mona nionso yina ke kwenda na ntwala, na kutadisaka kidimbu. Billy Graham, theologien mosi kele na kisalu, yina denomination ke kwikila. Oral Roberts, munganga mosi na kisalu, kaka mutindu ba Pentecotiste . . .

<sup>128</sup> Kasi beno tala awa, kima yankaka yina silamaka na Mbuma ya Abraham. Bawu kele kuna na kati ya ba denomination na bawu; kima mosi ke salama *na nganda* ya ba denomination, yina ke vukisa bantu. Beto ke bika yawu tii kuna mbasi na nkokila.

<sup>129</sup> Tala, mu zaba kento yina ve. Mu ke pesa yandi mukongo. Kana Mfumu Nzambi ke tuba kima mosi na kento yina, mbala yankaka yawu ke—yawu ke diambu ya dibuta, mbala yankaka yawu ke mambu ya mbongo, mbala yankaka yawu ke kimbevo; mu zaba ve. Yandi zaba kana yawu ke kieleka to ve.

<sup>130</sup> Kana Yandi ke sala kima mosi na nkokila yayi mutindu Yandi salaka na ntangu yina, beno lenda kwikila na Nzambi tí Yesu Klisto yina pesaka nsilulu ya kuvwanda awa na bilumbu ya nsuka? Yikwa ke kwikila tí beto ke zinga mutindu mosi na Sodome, ti ntoto ya muvimba ke zinga mutindu mosi na Sodome? Yikwa kati na beno ke kwikila tí yina mu me tuba na beno

na nkokila yayi ke Kieleka? Na yawu, bana mpe Mbuma ya Abraham, beno kwikila na Nzambi!

<sup>131</sup> Ntangu yayi, samu na kubasisa yawu na mabanza na beno tí mu ke meka na kutuba kima mosi na kento yayi, na kutalaka yandi na ilungi, to bima nionso yina me tala telepathie to konso kima yina beno zaba. Konso muntu yina zaba telepathie lenda vwanda na bumuntu ya mbote kulutila yina. Beno me mona? Beno me mona? Beno me monaka ntete muntu yina ke tangaka mabanza ya bantu ke longa Nsangu ya Mbote? Beno me monaka ntete muntu ya telepathie ke longa Nsangu ya Mbote, ke sala bidimbu mpe mambu ya ngitukulu, ke tuba tí Yesu Klisto ke mutindu mosi? Ve.

<sup>132</sup> Beno me mona, yawu ke kaka . . . yawu ke kaka mabanza ya bantu. Beno me mona, bawu ke bifwa-meso. Beno ke kwikila tí bawu ke bifwa-meso? Biblia ke tuba tí bawu ke vwanda mutindu yina. Ya kieleka ve? “Bantu ya kunatama, ya lulendo, bantu yina zola banzala ya nzutu kulutila Nzambi, bantu yina ke zitisaka balukanu na bawu ve, bafundi ya luvunu, bantu yina ke kukiyalaka ve, bambeni ya bantu ya mambote, bayina ke na mutindu ya nganda ya bunzambi, kasi ke manga yina ke pesaka Ngolo.”

<sup>133</sup> Yesu tubaka ve, na buku ya Santu Matthieu 24:24, tí na bilumbu ya nsuka bampeve nionso zole lenda vuna yina me Soolamaka, kana yawu lendaka salama? Kasi yawu lenda salama ve. Bawu vwandaka na kati ya mabanza ya Nzambi na mbatukulu, mpe bawu ke kitini ya Nzambi.

<sup>134</sup> Ntangu yayi, Nzambi ya Abraham, Isaac, mpe Jacob, bika tí bawu zaba tí mu ke tuba na bawu Kieleka samu na Nge na nkokila yayi. Yawu kele Nge, Mfumu. Na kukikulumusana nionso bika tí bamisadi na Nge kukatula mabanza na bawu, tí Nge lenda sadila banzutu na beto samu na Nkembo na Nge. Na Nkumbu ya Yesu, Mwana ya Nzambi. Amen.

<sup>135</sup> Yinki ke dikabu? Kima mosi ve yina nge ke baka mpe ke zenga-zenga mpe beno ke vutula. Ve, ve. Yawu ke kuzaba yinki mutindu nge ke katuka na nzila tí Nzambi lenda sadila nge. Dikabu kele kaka kukikatula na nzila, samu Nzambi kusadila yawu.

<sup>136</sup> Kento yina kele na manima na munu ke kufwa kana yandi beluka ve. Kento yina ke na manima na munu bawu sambilaka samu na yandi na muntu yankaka, ntama mingi ve. Yandi ke na cancer. Cancer ke na kati ya dibeke na yandi mpe na ba poumon na yandi. Ba me sambila samu na yandi ntama mingi ve, mpe yandi ke meka na kundima yawu na lukwikilu tí yandi me beluka. Yina ke MUTINDU ME TUBA MFUMU! Yina ke kieleka, mama? [Mama ke tuba, “Yinga, ya kieleka.”—Mu.] Kana yawu ke kieleka, ningisa—ningisa diboko na nge na ntwala ya

bantu. Nzambi ya Abraham ke zinga! Ya kieleka, kwenda na kukwikilaka yina nge ke kwikila mpe nge ke beluka. Amen.

Beno ke kwikila? Beno ke tuba, “Yinki diambu ya bantu yayi?”

<sup>137</sup> Kento yayi me vwanda awa na . . . na nsuka ya ndonga ya bisambu, kento ya zole kuna. Na ntangu mu balukaka mu monaka kima mosi, kima mosi na diboko na yandi, tension. Yandi vwandaka na tension. Ya kieleka, mama? Telemisa diboko na nge. Kana nge ke kwikila, kimbevo na nge ya tension ke beluka. Nzambi ya Abraham me kota na ksalu. Yandi ke kaka mutindu mosi, Ndinga ya Nzambi samu na bubu yayi!

<sup>138</sup> Yinki kiese na kukutana na nge? Beno ke kwikila ntangu yayi? Beno vwanda na lukwikilu na Nzambi! Nge ke monana kaka mwana ya fioti. Nzambi zaba ntima ya nge, mama, mu lenda ve. Beno ke kwikila tí Nzambi lenda tuba na munu yina ke tambula mbote ve? Beno ke kwikila na Yandi kana mu sala yawu? Yawu ke samu na nge ve, yawu ke samu na muntu yankaka, yandi ke mpangi na nge ya bakala. Mpe yandi ke bela mingi, mpe yandi ke na mbanza ya nord awa, Tulare. Mpe yandi ke na hopital, mpe yandi ke na leucemie, mpe baminganga tubaka tí yandi ke fwa. Kivuvu kele diaka ve. Ya kieleka. Beno ke kwikila yawu? [Mama, ke dila, yandi ke tuba, “Yinga.”—Mu.] Kieleka. Yinki ke na diboko na nge? Baka yawu mpe tula yawu na zulu na yandi. Mpe kutula ntembe ve. Kwikila! Amen.

<sup>139</sup> Beno ke kwikila? Mu me monaka ntete ve mama yayi na luzingu na munu. Kasi Nzambi ke bikala kaka Nzambi! Ntangu yayi, beno tuba na munu kana muntu lenda sala yina? Yawu ke ksalu ya muntu ve na kusala yawu. Yawu ke Nzambi yina Yesu Klisto tubaka ke vwanda awa na bilumbu ya nsuka mpe ke kukimonisa Yandi mosi (kaka na ntwala ya Mbuma ya Abraham) mutindu yawu vwandaka na bilumbu ya Sodome.

<sup>140</sup> Ntangu yayi awa, mu zaba ve mama yayi, beto ke banzenza mosi na yankaka, mu banza tí yayi ke mbala na beto ya ntete ya kukutana na luzingu na beto. Beno ke kwikila tí mu ke musadi na Yandi? [Kento ke tuba, “Yinga.”—Mu.] Nge ke kwikila tí yayi ke Ndinga? [“Yinga.”] Mpe nge zaba tí kana . . . Ndinga yayi zaba mabanza mpe banzala ya ntima. Ya kieleka? [“Ya kieleka.”] Ndinga ke Munganga, diaka, kana nge lenda kwikila Yawu. Nge ke kwikila yawu. Nge me fikama na kivudi mosi, diaka, na kivudi ya ndombe. Yawu ke cancer. Mpe nge ke kwikila tí Nzambi lenda tuba na munu wapi kisika cancer kele? Yawu ke na musopo ya nsi, munganga ke tuba mutindu yina. Nge ke kwikila ntangu yayi tí nge ke beluka? [“Amen.”] Kwenda, mpe kutula diaka ntembe ve, mpe Nzambi ke belusa nge. Amen.

<sup>141</sup> Beno ke kwikila, beno nionso? Yandi silaka na kusala mutindu yina! Vwanda na lukwikilu na Nzambi, kutula ntembe ve.

142 Beto kele banzenza mosi na yankaka. Mu zaba nge ve. Kana beto kele banzenza, bika tí kibuka ya bantu kuzaba yawu, beto telemisa maboko na beto. Mu me monaka ntete ve kento yayi na luzingu na munu.

143 Beno ke kwikila kuna na nganda? Beno ke kwikila tí yina ke Yesu Klisto? Yinki yawu kele? Yawu ke Ndinga na Yandi. Na ntangu bantu yayi mangaka Yawu, bawu mangaka muntu ve, bawu mangaka Ndinga. Yawu ke Ndinga yina basikaka, yawu lenda vutuka ve.

144 Ntangu yayi, mama yayi ke nzenza samu na munu. Mu me monaka yandi ntete ve na luzingu na munu. Nzambi ke Munganga. Yawu lenda vwanda ve samu na kubeluka, yawu lenda vwanda samu na diambu yankaka, kasi kana Nzambi kutuba na munu yina ke diambu ya nge, nge ke kwikila na munu? Diambu ya ntete nge zola tí bawu sambila, samu, nge ke na kifu na dikutu. Mosi ya makutu na nge, nge lenda wila yawu ve. Ya kieleka. Ya kieleka. Mpe nge me bakaka kifu, mpe nge zola basika na kimpika ya kifu yina, yawu ke kunwa makaya. Tula musapi na dikutu na nge ya mbote, mbote, dikutu na nge ya mbote. Yawu ke mbote. Ntangu yayi kwikila na Nzambi mpe kwenda na ntwala, mpe kusala ve. . . mpe nge ke nwa diaka ve makaya kana nge me kwikila. Kwenda, mpe Mfumu kusakumuna nge.

Beno me mona yina salamaka. Yandi ke kieleka ve?

145 Mu zaba nge ve, beto ke banzenza mosi na yankaka. Mu me monaka nge ntete ve na luzingu na munu, kasi Nzambi zaba nge. Kana Nzambi lenda tuba na munu kima mosi samu na nge, nge ke kwikila?

146 Bantu nionso ke kwikila? Muntu mosi kuna na nganda zaba kento yayi? Muntu mosi ve na kati ya bantu zaba kento yayi? Yawu ke mbote, beno ke zaba kana yayi ke kieleka to ve. Yayi lenda sukisa diambu. Yayi lenda monisa kieleka.

147 Ntangu yayi beno lenda mona yinki salamaka na bamuniti yayi ya nsuka. Beno me mona? Yawu ke kaka. . . Mu ke tekita. Beno me mona? Yawu ke monana ti mu ke swaswikisa kima mosi ve na ntwala na munu. Tala, Yawu ke zaba binsweki ya ntima. Beno me mona, Yawu ke Mpeve-Santu. Yawu ke munu ve. Yawu ke Ndinga yina silamaka samu na bubu yayi. Yawu vwandaka ntete ve kubanda na bilumbu ya bantumwa, yawu me vwandaka ntete ve. Kasi yawu tubamaka ti, “Kaka na ntwala ya kwizulu ya Mwana ya muntu. Mutindu yawu vwandaka na bilumbu ya Lot, yawu ke vwanda mutindu mosi na kwizulu ya Mwana ya muntu.” Mimpani ke kwikilaka Yawu ve. Bawu ke kwikila Yawu ve. Kasi bakwikidi ke kwikilaka Yawu!

148 Ntangu yayi, kana Mpeve-Santu ke monisa yayi, yikwa ke kwikila na ntima na bawu ya muvimba, beno lunga telemisa maboko na beno?

149 Nge ke na bamputa. Nge kutanaka na accident ya voiture, yawu bendaka ndambu ya misisa ya nkingu na nge. Nge kele mpe na mpasi ya rein. Ya kieleka, mutindu yina ve? [Kento ke tuba, “Yinga, tata.”—Mu.] Nge ke kwikila? [“Yinga, tata.”] Nge ke tuba tí yawu ke mbote. Mfumu kubaka lukumu.

150 Nge ke kwikila tí Nzambi ke belulaka kimbevo ya ba rein? Kwenda na ntwala mpe ndima kubeluka na nge.

151 Kwisa, mama. Tala na lweka yayi. Nge ke kwikila tí Nzambi ke belulaka bampasi ya ntima? Yawu ke mbote, kwenda na ntwala mpe kwikila, mpe ntima na nge ke beluka.

152 Kwisa awa. Nge ke kwikila tí Nzambi lenda belusa mpasi ya nge ya mukongo, kubelula nge? Kwenda na ntwala mpe kwikila mutindu yina.

Kwikila kaka na Nzambi, nge lenda sala kaka mutindu yina!

153 Kwisa, mama. Nge ke kwikila tí Nzambi ke belulaka kimbevo ya estomac? Kwenda, dia madia na nge ya nkokila, kwikila na ntima ya nge ya muvimba.

154 Kwisa. Nge ke kwikila tí Nzambi lenda belula kimbevo ya arthrite? Na yawu kwenda, kwikila, mpe sala. . . mpe Nzambi ke belula nge.

155 Yawu ke mbote, kwisa. Nge ke kwikila na ntima ya nge ya muvimba? Nge ke kwikila? Arthrite, diaka. Nge ke kwikila tí Nzambi lenda belula nge? Kwenda na ntwala, kwikila yawu, tuba, “Matondo, Mfumu.”

Yikwa ke kwikila na nganda kuna? Beno ke kwikila?

156 Mama yayi ke na robe ya mbwaki awa, me telemisa diboko na yandi na zulu awa, yandi ke na tension. Nge ke kwikila tí Nzambi lenda belula nge? Nge ke kwikila? Mbote. Tetika maboko na nge na zulu ya kento yina ke pene-pene na nge kuna, mpe tuba na yandi ndinga na yandi ke kuma mbote. Amen.

Yawu yina. Amen. Beno ke kwikila? Beno vwanda na lukwikilu!

157 Tala bakala yina me vwanda awa, yandi ke na hemorrhagie. Nge yina me vwanda awa, tata, nge ke kwikila? Yinga, nge ke na hemorrhagie. Nge ke kwikila tí yawu ke beluka?

158 Kento yina na lweka na nge kele mpe na hemorrhagie, mpe yandi ke na mpasi ya mukongo. Nge ke kwikila tí Nzambi ke belula nge? Nge ke kwikila? Telemisa diboko na nge mpe ndima yawu. Kwikila.

159 Kento yayi na lweka na nge awa ke na mpasi na makulu mpe na luketu na yandi. Nge ke kwikila tí yina ke kieleka, mama? Nge ke kwikila tí nge ke beluka? Mbote, telemisa diboko na nge, mpe tuba, “Mu ke ndima yawu.”

160 Mbote, kento na lweka na yandi ke na infection. Nge ke kwikila tí Nzambi ke belula microbe, mama na maneti na meso?



Telemisa diboko na nge, tuba, “Mu ke ndima yawu.” Mbote, kwikila yawu.

<sup>161</sup> Mama na lweka na yandi ke na mpasi ya rein. Nge ke kwikila tí Nzambi ke belusa mpasi ya rein, mama? Mbote, telemisa diboko na nge, ndima yawu.

<sup>162</sup> Kento ya leke na ntwala na yandi ke na goitre. Nge ke kwikila tí Nzambi ke belula goitre na nge? Telemisa diboko na nge, ndima yawu.

<sup>163</sup> Yikwa ke kwikila na ntima na bawu ya muvimba? Na yawu beno telema mpe beno ndima yawu. Telema na Ntwala ya Nzambi ya Abraham, Isaac, mpe ya Jacob.

<sup>164</sup> Na Nkumbu ya Mfumu Yesu Klisto bika tí Mpeve-Santu kulumuka na yinzo yayi na ntangu yayi mpe kubelula konso muntu na Ntwala ya Nzambi!



*NZAMBI KELE MUTENDUDI NA YANDI MOSI* KNG64-0205

(God Is His Own Interpreter)

Nsangu yayi ya Mpangi William Marrion Branham, kulongamaka na Kingelesi, na nokola ya Kilumbu ya tatu, na kilumbu ya 5 ya Ngonda ya Zole, na mvula 1964, na Kern County Fairgrounds na Bakersfield, California, U.S.A., yina bakamaka na bande manietiki mpe basisamaka na movimba nionso na buku na Kingelesi. Lubangulu yayi na Kituba basisamaka na buku mpe ba kabulaka yawu na Voice Of God Recordings.

KIKONGO-KITUBA

©2019 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)